

الاحسان



مؤمن ولد جميل
ساكن مع والده
ووالدته وأخوه محسن

يومية مؤمن يصحى

يصلى الفجر مع والديه ويقرا قصار السور من القرآن

ويقعد يذاكر دروسه علشان يبقى نشيط ويتنفس او كسجين
نقى ويبقى كله حيويه

يفطر مؤمن ويشرب اللبن ويلبس وياخد سندوتشات الجبنة
الى بيحبها ويجرى بسرعة على مدرسته

أه نسيت أقولكم أن مؤمن دايم يدفع فى تبرعات المدرسة
للفقراء من مصروفه الشخصى

وفى يوم من أيام المدرسة لقي أكثر من تلميذ جاى
المدرسة بهدوم قديمة وجزم مقطعة وكمان خفيفة والدنيا برد
جداً

مؤمن رجع البيت وهو حزين وزعلان من اللي شافوا وقعد
يلوم نفسه

- أزاى أنا مأخذتش بالى من الموضوع ده أنا كدا أبقى
مقصر تجاه الفقرا أنا غلطان .. أكيد غلطان

مؤمن فتح دولابه لقي عنده خمس جواكت وحوالى تسع
بنطلونات وبلوقرات كتير

مؤمن قفل الباب على نفسه وفضل يبكى ويستغفر ربنا وهو
بيصلى العصر.. بابا دخل يطمئن عليه لقاه فى حاله حزن
شديدة .. أستعجب باباه وقاله

- مؤمن مالك قافل الباب عليك وقاعد زعلان ليه وبص
باباه فى عنيه لقاهها كلها دموع فسأله

ياااه أيه يا مؤمن يا حبيبي اللي مزعلك لدرجة إنك بتبكي
بحرقه كدا ؟ وأخذه فى حضنه وطبطب عليه وهواه وطلب
من ماما تعمله كوباية ليمون تروق أعصابه

وبعد ما مؤمن شرب الليمون قاله

-أيه بقى يا حبيبي اللي مزعلك

قام مؤمن وفتح دولابه وقاله

- هو ده اللي مزعلنى يا بابا

- أيه الدولاب والا الهدوم؟ مش فاهم

- لا زعلان أن كل دى هدوم عندى وليا أصحاب فى
المدرسة مش لاقين جاكيت ولا بلوفر يديهم وحاسس بالذنب
من ناحيتهم وواجب عليا أنى أخذ من هدومى وأدى
المحتاج علشان ضميرى يرتاح لازم أحسن للفقرا وأساعدهم

- ياه بس كدا ولا تزعل يا مؤمن

خد اللى أنت مستغنى عنه من ملايسك وأهديه للمحتاج ولا
تزعل نفسك

-أنا فعلا كنت هعمل كدا يا بابا بس دا مش كفاية أنا جت
لى فكرة يا رب تعجبك

- قول يا حبيبى

أنا هعمل حملة للإحسان فى المدرسة وكل اللى عنده حاجة
مستغنى عنها يجيبها مش بس هدوم لا وجزم وكتب وأدوات
مدرسية لأن فيه أصدقاء بيبقى معاهم بدل الأدوات أتتين
وتلاثة وعشرة وفيه برضوا اللى بيتضربوا كل حصة علشان
معندهم مش مقدرة يجيبو الأدوات المطلوبة

- دى فكرة هائلة والله يا مؤمن وأنا من ناحيتى هجى
معاك بكرة نعرض الفكرة على الأخصائى الاجتماعى
وتبدأ الحملة وتانى يوم بابا مؤمن راح معاه المدرسة
وقابل الأخصائى وعرض عليه فكرة مؤمن. والمدرس
رحب جداً بالفكرة ووعد أنه هيجيب كشف بأسماء
التلاميذ الغير مقتدرين ويعمل ركن فى حجرة الملابس

الرياضية ويسميه ركن الأحسان وبدأت الحملة ومعظم
الأولاد بقوا لابسين وشكلهم منسق ودفينين وأتغير
الشكل العام لتلاميذ المدرسة وطلب الأخصائي من
مؤمن يستعد علشان يكرمه فى طابور الصباح على
فكرة ركن الأحسان لكن مؤمن أعتذر بأدب وقال
للأخصائي أنا عملت كدا أبتغاء مرضاة الله ومرضاة
ضميرى وأنا مش ممكن أنتظر شكر على الأحسان
لأن صفة الأحسان دى لا بد تكون صفة المسلمين
جميعا وعجز الأخصائي عن الرد على مؤمن وقاله
بارك الله فيك يا مؤمن وجزاك الله كل خير

